

Hawfwen “Sam Nyied Sam” Vujmingz:

Fungsug Daegbied Hozdung Mizyinx Vunz Angq Lai

风俗独特情趣盎然的武鸣“三月三”歌圩

□ Hoz Yiliagz iagj Siabyungz boiz



▲ Ram Mehlungz cunzyouz, hawj mbanj raeuz hwngvuengh.



▲ Fouxsaux caen ndei yawj, hawj vunzlai caemh diuq.



▲ Ciengj bauqva haenqrem, boux rengzak dued ciengj.



▲ Vunzmbanj dwkcuengq caeq vuengzcoj, caensim gyo-mbaiq miz ngoenzneix.



▲ Yienj diuq fouxgoengsae, hawj caezgya mbaenj fuk.



▲ Dahniq caemh eu fwen, sing rwenzred sepset.



▲ Caeq vuengzcoj Loegyied, doxiekae daeuj doxgo.



▲ Gvaq ciet sim' angq lai, comz gwnz gai diuq foux.



▲ Ngoenzciet angq doiq fwen, hwnzngoenz wenq mbouj duenh.



▲ Yawj duzgaeq doxdoj, caemh goj miz yinxdaeuz.



▲ Dwkcuengq saenz Loegyied, mbaenj dieg raeuz vuenyungz.

Moix bi liggaueq ndwensam cosam dwg ngoenzciet conzdungj Bouxcuengh, youq Mbanjcuengh Vujmingz Yen, hawfwen “sam nyied sam” moix bi caemh banh ndaej nauhyied hoenghwd, mbauqsau doiq fwen, diuq fouxfaexsaux, ciengj bauqva, gaeq doxdoj daengj lai cungj lai yiengh hozdung caeuq gij vwnzva Bouxcuengh daegsaek noengznwd haenx ciengz dem ciengz yienj mbouj rox sat, dawz gij fungsug fungcingz Mbanjcuengh daegbied gag miz haenx baijyienj youq dangqnaiz vunzlai, hawj vunz yawj gijneix lauz gijhaenx dwk baenqlaenlaen cix angqvauvau.

“Sam nyied sam” caemh heuhguh “cietfwen sam nyied sam” roxnaeuz “hawfwen sam nyied sam”, mbanj dieg cix heuhguh “noengzdoengh”, dwg cietfwen conzdungj Bouxcuengh. Ngoenzciet, dieg Bouxcuengh ranzranz naengj haexnaengj haj saek, dumq nyumx gyaeggaeq saeknding, dwkcuengq cojcoeng, gaj gaeq gaj bit loengh byaek dakdaih caencik baengzyoux, guh gak cungj hozdung angq hoh ngoenzciet. Ngoenzciet itbuen gvaq song sam ngoenz, ndaw mbanj lij youq giz dieghoengq diegbingz henz mbanj dap aen bungz hung doiq fwen ndeu, dakdaih canghfwen mbanj wnq. Hawfwen Vujmingz Yen daj ciuhgeq couh gig hwnghoengh, haetromh ngoenz “sam nyied sam”, ciencien fanhfanh mbauqsau ndaw gvaengz geijcib leix haenx ndang daenj buhvaq bonj minzcuz moqsup, raek gyaeggaeq nding caeuq haexnaengj haj saek, daj seiq fueng bet baih comz daengz giz ndeu doiq fwen. Geij

ngoenz de, gyoengq mbauqsau mwngz coenz gou gawq, mwngz cam gou dap, hwnzngoenz mbouj dingz, sing fwen sepset rwenzred, nauhyied dangqmaz. Ngoenzciet cawz doiq fwen le, lij banh miz ciengj bauqva, dwkdomq, mbauqsau dokgyaeq daengj hozdung mizyinx, hawj vunzlai yawj dwk deihdeih bek fwngz hemq ndei, najhai sim' angq.

Daj 1985 nienz gvaqdaej, Vujmingz Yen lienzdaemh banh le 18 gaiq cietfwen “sam nyied sam”, 2003 nienz cingqsiak dawz “cietfwen” fuk gaj baenz “hawfwen”. Ginggvaq haeujsim roengzrengz banh roengz-daeuj, seizneix hawfwen “sam nyied sam” Vujmingz gaenq baenz aen binjbaiz vwnzva gig dijbauj ndeu, baenz le aen bingzdaiz swncienz, hwngfat minzcuz vwnzva maenhndei, cauxguh caeuq baihrog doxgyau, cimh canghhek yinx roengzngaenz ndeu, rengzrd dwk daiqdoengh le gij hangznib doxgven ndaw yienh guh hoengh baenaj. 2008 nienz Hawfwen “Sam Nyied Sam” Vujmingz ndaej senj haeuj buek daihngaih swcigh gaep feihvuzciz vwnzva yizcanj mingzloeg, 2010 nienz Vujmingz Yen ndaej Vwnzvabu dingh guh “Cungguek Mbanjcuengh Vwnzva Yenzgiu Baujhoh Gihdi”. 2011 nienz, Vujmingz Yen dawz gij mingzcwng ngoenzciet demgaij baenz “Cungguek Mbanjcuengh Hawfwen ‘Sam Nyied Sam’ Vujmingz Nem Ciet Lijyouz Vwnzva Loegyied”, demgya le gij neiyungz vwnzva Loegyied ciuhnduj caeuq lijyouz hozdung, hawj ngoenzciet engq yinx vunz lo.